



Na suđenju za zločine nad civilnim stanovništvom Ilijaša, Sudsko vijeće Državnog suda preslušalo je iskaze tri zaštićena svjedoka. Nakon što je pred Sudom BiH iznova počelo suđenje Srpku Pustivuku, nekadašnjem pripadniku Stanice javne bezbjednosti (SJB) Ilijaš, preslušani su iskazi zaštićenih svjedoka Državnog tužilaštva pod pseudonimima S3, S4 i S5.

S4 i S5, brat i sestra koji su 1992. imali 11. i 12. godina, prvobitno su svjedočili pred Sudom BiH [10. novembra](#) prošle godine, kada su ispričali da je na početku rata izvršen napad na kuću Uzeira Selimovića u Ilijašu, u kojoj su u to vrijeme boravili, te da su tada ranjeni. Iskaz svjedokinje S3 saslušan je bez prisustva javnosti, zbog mjera zaštite koje su joj dodijeljene. Pustivuk se optužnicom Tužilaštva BiH tereti za učešće u napadu na selo Gornja Bioča (općina Ilijaš) 29. maja 1992., s drugim pripadnicima vojske i policije Srpske Republike BiH, kada je ubijen jedan, a teško su ranjena tri civila. Pustivuk je uhapšen u julu prošle godine, od kada se nalazi u pritvoru, a suđenje mu je počelo 2. novembra iste godine. Međutim, zbog bolesti jednog od članova Sudskog vijeća, koji je nakon tromjesečne pauze zamijenjen, suđenje je krenulo ispočetka. Prema službenom rasporedu Suda BiH, suđenje Pustivuku će se nastaviti 29. marta ove godine.

*\*Preuzeto sa: <http://www.ilijas.ba>*